



Uspješna Priča

Rafteri spašavali živote tokom poplava u BiH

Zanemarivši dugogodišnje etničke podjele, spasioci su smjestili sugrađane na sigurno

Avgust 2014 – Kažu da se veliki ljudi poznaju po tome kako pričaju o svojim djelima i nerado sebe stavljaju u prvi plan, a takvi su hrabri rafteri iz banjalučkog Rafting kluba Kanjon koji su među prvima stavili svoje živote i vještine u službu spašavanja žrtava razornih poplava u Bosni i Hercegovini u maju 2014. godine.

"Ni mi, niti bilo koji drugi rafting ili ronilački klub nismo neki heroji; mi živimo na vodi", kaže Aleksandar Pastir, predsjednik Udruženja raftera BiH i suvlasnik u Rafting kluba Kanjon. "Pravi junaci su obični ljudi koji su, bez ikakvog prethodnog iskustva, u tenisicama i farmerkama, radili tih dana s nama u izuzetno teškim uslovima, stavljajući nebrojeno puta svoje živote u opasnost", rekao je on.



*Rafteri spašavaju žrtve poplava u Bosni i Hercegovini.
Foto: Nikola Vidačković, Nezavisne Novine*

Većina raftera koji su upravljali operacijama spašavanja su iskusni skiperi certificirani prema međunarodnim standardima putem programa koji je 2007. godine podržao USAID.

Ali, Pastir je skroman. Dok je voda odnosila ceste i mostove, on i njegova ekipa nisu imali nikakve informacije o stanju na terenu u Doboju. Spakirali su neoštećenu opremu koja im je ostala - 27 čamaca, 30 vesala i 60 kabanica - i krenuli u nepoznato. Približavajući se Doboju, postalo im je jasno da je situacija ozbiljna. Cijela sela su bila pod vodom, koja je na nekim mjestima već pokrivala prvi sprat kuća. Pastir procjenjuje da je visina vode u tom trenutku bila četiri metra, a i dalje se povećavala.

"Imam mnogo iskustva s vodom, ali nikad nisam vidio da voda raste tako brzo", rekao je Pastir. "Nemoguće je da se čovjek zaštiti od toga. Zamislite situaciju gdje jedan momak pokreće čamac sa spasiocima, opremom i evakuisanim ljudima, a nekoliko metara ispred vas talas viši od metra baca kiosk, automobil i u jednom trenutku i čitavu plinsku stanicu kao dječiju igračku".



Rafteri gaze vodu duboku do struka kako bi spasili žrtve poplava u Bosni i Hercegovini. Foto: Nikola Vidačković, Nezavisne Novine

Stepen opasnosti je bio visok čak i za obučene raftere koji se bave ekstremnim sportovima na vodi. Jedno je upravljati čamcem na rijeci ili jezeru, a sasvim drugo je voziti čamac kroz centar grada koji je poplavila divlja nabujala rijeka.

Rafteri kluba Kanjon su proveli tri dana u Doboju bez trenutka predaha. Evakuirali su stotine ljudi, dostavljali prijeko potrebne namirnice, hranu za djecu i lijekove bez kojih bi

broj tragično izgubljenih života sigurno bio veći. Rafteri Kanjona nisu jedini primjer rafting klubova koji su se odazvali na akciju za pomoć građanima kojima je njihova pomoć bila potrebna. Zanemarivši dugogodišnje nacionalne podjele, rafteri iz Bihaća i Ključa su također pomagali ljudima iz Doboja; rafteri iz Konjica su pomagali u Maglaju i Šamcu; rafteri iz Foče u Bijeljini. Svi ove rafting klubovi su korisnici projekta FIRMA, koji im je, od 2009. godine, osigurao obuku, certifikaciju i druge vidove pomoći.